

sunt, sed eadem, cum non minus ex mandato quam facto pœna capitalis sequatur. Sic David vir Mortis nuncupatur, & necis Uriæ Causa Moralis est, licet enim ipse eum non trucidarat, per ejus tamen jussa, mortis falce interemptus est Urias, quippe qui in principio prælii acerrimi locabatur, derelictus omni subsidio eo quod à tergo recedebant, ut eò citius percutiatur. Hinc optimè dicit Don. Isaac Abravanel de Occis. Uriæ. Tribuitur Davidi factum necis, sive ille ipsemet nullo interveniente alio commiserit, sive saltem ut id fieret præceperit. Tunc enim id fecit per alium. Referri huc quoque solet **Ratihabitio** factum insequens & confirmans, veluti cum quis antea factum facinus ratum habet, atque id ut acceptum & approbatum pronunciat. ( $\beta$ ) Consulendo, quando suggeritur modus rem conficiendi, aut via monstratur, quomodo factum peragi & effectus produci potest, nec non media & auxilia subministrantur. Consilium autem ab eo præprimis provenit, qui persuadet ac impellit, ac ad faciendum instruit. Auxilium fertur ab eo, qui adjutorium atque ministerium ad res suscipiendas præbet. Et Consilium est vel absque auxilio, vel cum auxilio Conjunctum. Utrumque verò spectari potest, vel ante, vel intra, vel post effectum. Sic Haman blanditiis suis persuasit Ahasvero, ut per publicum decretum omnes Judæos ex sua ditione ac territorio proscriberet. Sic Achitophel Absoloni dedit Consilium, ad violandas genitoris sui concubinas. Sic Thais, uti Curtius refert l. 5. p. 131. Alexandro M. persuasit, quod maximam apud omnes Græcos initurus esset gratiam, si Regiam Persarum Persepolin incendi jussisset, quod fœdissimum facinus quoque Thaidi adscribitur, dum Alexand. M. & ejus convivas ad præcipiendum incendium stimulavit. ( $\gamma$ ) Consentiendo & Laudando, cum permissio ac venia conceditur, absque qua res confici haud potuisset, nec non cum factor tanquam strenuus agilis ac versutus decantatur, cui omnia cœpta ex voto succedunt prospere. Ita Ahab, Causa Moralis homicidii vocatur, quamvis enim ad mortem Nabothi physice non concurreret, consensit tamen uxori nec non permisit, ut literæ, quæ Nabothi interitum accelerare debebant, suo obsignarentur annulo. Et æque suo consensu peccavit, quam qui cœdem Nabothi causavit Physice. Notandum.